



Jadual Pembacaan Khubah Jumaat

Siri 11/ 2023 (Novomber Tahun 2023)

تاریخ	تاجوق	ب
3 November 2023M/ 19 Rabi'ul Akhir 1445H	Integriti Pendokong Kekuatan Ummah	1.
10 November 2023M/ 26 Rabi'ul Akhir 1445H	CHIKADUN	2.
17 November 2023M/ 3 Jamadil Awwal 1445H	Menggali Semangat Al-Jazari	3.
24 November 2023M/ 10 Jamadil Awwal 1445H	Surat Cinta Dari Ilahi	4.
Khutbah Kedua		

دبیایاء:



زكاة فولاو فينغ

دترییتکن:



جابتن حال إحوال اگام اسلام فولاو فينغ



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Integriti Pendokong Kekuatan Ummah

3 November 2023M/ 19 Rabi'ulakhir 1445H

(Khutbah Khas Jabatan Integriti)

الْحَمْدُ لِلَّهِ الَّذِي أَمَرَنَا بِحِفْظِ الْأَمَانَةِ، وَنَهَانَا عَنِ التَّضْيِيعِ وَالْخِيَانَةِ،
وَحَثَّنَا عَلَى الرُّقِيِّ فِي مَدَارِجِ الْكَمَالِ، وَالْإِثْقَانِ فِي آدَاءِ الْأَعْمَالِ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، الْمَلِكُ الْأَعْلَى،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ وَحَبِيبُهُ الْمُجْتَبَى.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَاتَّبَاعِهِ أَهْلِ الْبِرِّ
وَالْوَفَاءِ، وَأَرْبَابِ الْإِثْقَانِ وَالصَّفَاءِ. أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ،
إِنَّ تَقْوَى اللَّهِ هِيَ جَمَاعُ الْخَيْرَاتِ، وَسَيَاجُ السَّلَامَةِ لِلْأَفْرَادِ وَالْمُجْتَمَعَاتِ
قَالَ اللَّهُ تَعَالَى: إِنَّا عَرَضْنَا الْأَمَانَةَ عَلَى السَّمَوَاتِ وَالْأَرْضِ وَالْجِبَالِ فَأَبَيْنَ أَنْ يَحْمِلْنَهَا وَأَشْفَقْنَ
مِنْهَا وَحَمَلَهَا الْإِنْسَانُ إِنَّهُ كَانَ ظَلُومًا جَهُولًا ﴿٧٦﴾ ﴿سورة الاحزاب : 72﴾

PARA TETAMU JUMAAT YANG DIKASIHI SEKALIAN,

Saya ingin mengingatkan diri saya dan sidang jemaah sekalian,
marilah kita bersama-sama meningkatkan keimanan dan ketakwaan kepada
Allah سُبْحَانَهُ وَتَعَالَى dengan melaksanakan suruhan-Nya dan meninggalkan



larangan-Nya di samping berusaha mencari kehidupan yang diberkati dan diredai oleh Allah. Mudah-mudahan kita berjaya menjadi insan yang beruntung di dunia dan di akhirat.

Selain itu, khatib juga ingin mengingatkan sidang hadirin sekalian, agar memberi fokus dan mendengar dengan bersungguh-sungguh khutbah Jumaat ini. Janganlah leka bermain gajet, tidur dengan sengaja, berbual-bual atau menggerakkan tabung kutipan masjid kerana perbuatan-perbuatan tersebut bertentangan dengan adab mendengar khutbah. Sempena Hari Integriti Nasional 2023 yang disambut pada bulan November setiap tahun, khatib akan membicarakan khutbah yang bertajuk **“Integriti Pendokong Kekuatan Ummah.”**

SIDANG JUMAAT YANG DIRAHMATI ALLAH SEKALIAN,

Integriti menurut Islam merujuk kepada salah satu dari cabang-cabang takwa. Perbincangan integriti dalam Islam kerap kali dikaitkan dengan konteks amanah dan itqan yakni bersungguh-sungguh dalam melakukan pekerjaan. Terdapat dua ciri orang beriman yang digambarkan oleh Allah **سُبْحَانَهُ وَتَعَالَى** dalam surah al Mukminun, ayat 8:

وَالَّذِينَ هُمْ لِأَمْنَتِهِمْ وَعَهْدِهِمْ رَاعُونَ ﴿٨﴾

Maksudnya: *“Dan mereka yang menjaga amanah dan janjinya.”*

Merujuk kepada maksud ayat tersebut, Islam mewajibkan umatnya untuk menjaga dan memelihara amanah dan janji yang diberikan dengan

sebaik-baiknya sama ada antara seorang hamba dengan Allah **سُبْحَانَهُ وَتَعَالَى** atau sesama manusia. Sebagai orang yang beriman, janganlah kita mengkhianati amanah dan janji kita terutama dengan Allah, sama ada dengan melanggar larangan-Nya atau mengabaikan perintah-Nya.

Begitu juga dalam hubungan sesama manusia, segala perkara yang diamanahkan dan janji yang dilafazkan mestilah dilaksanakan dengan sempurna sama ada dalam konteks hubungan berkeluarga, bermasyarakat dan bernegara. Di samping itu, Rasulullah **صَلَّى اللَّهُ عَلَيْهِ وَسَلَّمَ** juga sangat menekankan sifat amanah dan itqan ketika bekerja seperti dalam hadis yang bermaksud:

“Sesungguhnya Allah mencintai seseorang yang apabila dia mengerjakan sesuatu pekerjaan, dia melakukan dengan itqan (bersungguh-sungguh).”

﴿Hadis Riwayat At-Tabarani﴾

Dari maksud hadis ini, Islam menitikberatkan supaya umatnya sentiasa bersungguh-sungguh dalam melaksanakan tugas dengan amanah, rajin dan memegang nilai kebaikan yang tinggi termasuk mengamalkan integriti pada setiap masa dan setiap perkara.

SIDANG JUMAAT YANG DIRAHMATI ALLAH,

Kisah dan contoh nilai integriti yakni amanah yang boleh kita teladani adalah melalui kisah Nabi Yusuf **عَلَيْهِ السَّلَامُ**. Baginda merupakan seorang rasul

yang terkenal dengan kemampuan untuk melakukan perancangan ekonomi dan kewangan negeri Mesir. Beliau menawarkan diri kepada Raja Mesir ketika itu untuk menjawat jawatan Bendahara Negara kerana yakin dengan amanah dan kewibawaannya dalam menjalankan tugas tersebut. Ini jelas digambarkan dalam Al-Quran melalui firman Allah **سُبْحَانَهُ وَتَعَالَى**, dalam surah Yusuf, ayat 55:

قَالَ أَجْعَلْنِي عَلَى خَزَائِنِ الْأَرْضِ إِنِّي حَفِيظٌ عَلِيمٌ ﴿٥٥﴾

Maksudnya: *“Nabi Yusuf berkata: Jadikanlah aku Pengurus Perbendaharaan Hasil Bumi (Mesir); sesungguhnya aku bersedia menjaganya dengan sebaik-baiknya lagi mengetahui cara mentadbirkannya.”*

Apa yang kita dapat pelajari daripada kisah Nabi Yusuf ini adalah baginda bersedia berkhidmat bukan kerana mengharapkan jawatan mahupun kedudukan, akan tetapi demi untuk menjaga kemaslahatan dan bagi memastikan negara dapat ditadbir dengan baik. Baginda sentiasa menitikberatkan elemen amanah dan ilmu dalam mengurus serta menjaga khazanah negara. Pasti ini merupakan salah satu aspek penting yang perlu kita amati dalam konteks masyarakat, negara dan dunia pada hari ini.

Sudah sewajarnya dengan contoh nilai terbaik yang ditunjukkan dalam Al-Quran melalui kisah-kisah para rasul dan nabi, nilai integriti seperti amanah dan adil sepatutnya ditanam dan diserap menjadi satu sikap yang sehati dalam diri kita semua. Sebagai umat Islam yang mempunyai nilai dan

akhlak yang terpuji, sepatutnya ia lebih terserlah dalam bentuk perlakuan bukan sahaja kelembutan peribadi akan tetapi kemuliaan akhlak dari sudut kejujuran dan kebertanggungjawaban.

SIDANG JUMAAT YANG DIRAHMATI ALLAH,

Pembudayaan nilai integriti merupakan satu sifat terpuji yakni sifat mahmudah yang harus diterapkan dalam kehidupan seorang insan seperti mana yang ditunjukkan oleh Baginda Nabi Muhammad ﷺ. Baginda sentiasa mengamalkan dan menunjukkan contoh ikutan yang terbaik kepada umatnya seperti yang digambarkan oleh Allah ﷻ melalui firman-Nya dalam surah al-Ahzab, ayat 21:

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ وَالْيَوْمَ الْآخِرَ وَذَكَرَ اللَّهَ كَثِيرًا ۖ

Maksudnya: “Sesungguhnya telah ada pada (diri) Rasulullah itu contoh teladan yang terbaik (iaitu) bagi orang yang sentiasa mengharap (keredaaan) Allah dan (balasan baik) hari akhirat dan banyak menyebut serta mengingati Allah (dalam masa susah dan senang).”

Tanpa integriti, sesuatu itu seperti tidak beramanah dan tidak berlaku jujur serta sentiasa bergelumang dengan sifat mazmumah. Ia akan menyebabkan kedudukannya terjejas di sisi Allah malah akan mendapat kecelakaan di dunia dan di akhirat.

Akibatnya telah diceritakan melalui suatu riwayat daripada Ibnu Abbas رَضِيَ اللَّهُ عَنْهُ selepas tamatnya Peperangan Khaibar, beberapa orang sahabat Nabi صَلَّى اللَّهُ عَلَيْهِ وَسَلَّمَ telah berkata mengenai sahabat yang telah gugur syahid “Fulan ini telah syahid, fulan ini telah syahid sehingga sampai kepada seorang lelaki dan mereka berkata “Fulan ini telah syahid.” Tetapi Baginda Nabi صَلَّى اللَّهُ عَلَيْهِ وَسَلَّمَ bersabda yang maksudnya:

“Sesekali tidak. Sesungguhnya aku melihatnya di dalam neraka kerana jubah yang dicurinya.”

﴿Hadis Riwayat Muslim﴾

Walaupun seseorang itu kelihatan pada zahirnya berjuang pada jalan Allah namun perlakuan tidak jujur dan tidak amanah, mengakibatkan dirinya tidak terlepas dari azab dan hukuman di atas perbuatannya itu.

SIDANG JEMAAH YANG DIRAHMATI ALLAH,

Sambutan Hari Integriti Nasional yang disambut pada setiap 5 November saban tahun adalah bertujuan bagi memohon kesedaran bukan sahaja dalam kalangan penjawat awam malah di setiap lapisan masyarakat mengenai keperluan dan kepentingan mengamalkan nilai-nilai murni dan integriti secara berterusan.

Bersempena Bulan Integriti Nasional 2023, Institut Integriti Malaysia (IIM) melaksanakan program-program kesedaran di samping meningkatkan



serta memperkasakan lagi ekosistem dan pembudayaan integriti serta tata kelola negara buat seluruh rakyat Malaysia. Semoga inisiatif-inisiatif yang dilaksanakan oleh IIM akan dapat melahirkan generasi dan masyarakat MADANI dan seterusnya membentuk negara yang harmoni.

SIDANG JUMAAT YANG DIRAHMATI ALLAH,

Mengakhiri khutbah pada hari ini, marilah kita menghayati beberapa intipati berikut:

Pertama: Pembudayaan, pengamalan dan penghayatan terhadap nilai integriti adalah sejajar dengan nilai akhlak dalam Islam yang sepatutnya dijadikan satu manifestasi asas dalam kehidupan seharian.

Kedua: Ingatlah, amanah itu sangat berat, maka peliharalah ia sebaik-baiknya. Manakala, berbuat janji itu sangat mudah, maka tepatilah ia dengan penuh kesungguhan.

Ketiga: Berusahalah menjadi insan yang mengamalkan nilai-nilai baik agar dapat meningkatkan nilai diri, keluarga, masyarakat dan negara menuju ke arah yang lebih diberkati serta diredai oleh Allah **سُبْحَانَهُ وَتَعَالَى**.

Renungilah firman Allah dalam surah an-Nahl, ayat 97:

مَنْ عَمِلَ صَالِحًا مِّنْ ذَكَرٍ أَوْ أُنْثَىٰ وَهُوَ مُؤْمِنٌ فَلَنُحْيِيَنَّهٗ حَيٰوةً طَيِّبَةً وَلَنَجْزِيَنَّهُمْ أَجْرَهُمْ

بِأَحْسَنِ مَا كَانُوا يَعْمَلُونَ ﴿٩٧﴾

Maksudnya: “Sesiapa yang melakukan amalan soleh, baik lelaki mahupun perempuan dalam keadaan beriman, maka sesungguhnya, Kami akan kurniakan kepadanya kehidupan yang baik dan sesungguhnya Kami akan berikan balasan kepada mereka dengan pahala yang lebih baik daripada apa-apa yang telah dilakukan mereka.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،
إِنَّهُ هُوَ الْغَفُورُ الرَّحِيمُ.



Khutbah Kedua Bulan November

2023M/ 1445H

الْحَمْدُ لِلَّهِ عَلَى الْإِيَّهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُجَّتِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

[الأحزاب: 56]

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Khatib juga mengambil kesempatan ini untuk menyeru para jemaah
sekalian agar terus memberikan sokongan padu tanpa berbelah-bagi
kepada penduduk Palestin yang sedang dizalimi oleh Regim Zionis melalui
serangan tanpa henti di Gaza dan Tebing Barat.



Kita mungkin tidak mampu mengangkat senjata, tetapi kita masih mempunyai kekuatan daripada aspek kewangan. Infakkanlah sebahagian rezeki untuk membantu mereka yang ketika ini berada dalam keadaan yang amat menyedihkan serta menjalani kehidupan yang sukar. Selain itu, gunakanlah senjata paling ampuh yakni DOA. Semoga Allah **سُبْحَانَهُ وَتَعَالَى** menganugerahkan kejayaan, keselamatan dan kesejahteraan buat seluruh umat Islam serta rakyat Palestin khususnya. Semoga bumi Palestin kembali aman dan makmur di bawah rahmat Allah **سُبْحَانَهُ وَتَعَالَى**.

اللَّهُمَّ أَعِزِّ الْإِسْلَامَ وَالْمُسْلِمِينَ، اللَّهُمَّ أَذِلَّ الشُّرْكَ وَالْمُشْرِكِينَ، اللَّهُمَّ انصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلِسْطِينَ وَفِي كُلِّ مَكَانٍ وَفِي كُلِّ زَمَانٍ.

Ya Allah! Muliakan Islam dan orang Islam. Ya Allah! Hinakan Syirik dan musyrikin. Ya Allah! Berilah pertolongan kepada saudara-saudara kami yang muslim, para mujahidin dan golongan-golongan yang lemah di Palestine dan juga di semua tempat dan setiap ketika.”

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا. اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli

Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرِّبَا وَالزُّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَنِ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٩﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ
عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٢٥﴾

